


ORIENTAL JAPANESE LIBRARY OF
HARVARD-YENCHING INSTITUTE
AT HARVARD UNIVERSITY
JAN 10 1941



文獻通考卷三十四

選舉上

明倫彙編 家範典 選舉考 第一

夫歷脩途者資良輔輔大廈者資良木君萬國者寧能
不資於賢士大夫哉蓋天之生賢實為世用而賢者之
坐於世亦欲赴幾會立尺寸之功誠博求慎擇而愛護
之則眾庶靡遺而古人之誅禱千朝矣宋選舉有科目
有學校有辟召其用之也有餘蔭有保任有考課三百
年間所待名卿良史與大節表之臣舉然誠近代為
最盛也蓋士之數情才世以降漢壞為學問官列儒

宋史新編卷三十四

志二十

選舉上

明南京戶部

主事蒲田

柯維騏編

哈佛大學漢和
圖書館珍藏印

夫歷脩途者資良驥構大廈者資良木君萬國者寧能不資於賢士大夫哉蓋天之生賢實為世用而賢者之生於世亦欲赴機會立尺寸之功誠博求慎擇而愛護之則黎獻靡遺而古人之詠播于朝矣宋選舉有科目有學校有辟召其用之也有銓蔭有保任有考課三百年間所得名卿良吏與夫節義之臣纍纍然視近代為盛蓋收養士之效云惜季世以降寢壞舊章闈宦列儒

科闕閱冒上第闕冗躡顯劇甚至以黨人僞學斥逐善類其禍視漢唐朋黨尤烈易鼎之九四曰鼎折足覆公餗言大臣敗天下事也彼章惇蔡京秦檜韓侂胄輩惟快已私不恤亂人之國哲宗諸君何利於若人而委之柄哉嗚乎以人事君者上臣也以德定相者哲王也若宋季君臣所謂昏佞相濟非邪

宋之科目初惟進士及諸科歲舉爲常然以諸科賜第者後復應進士舉則進士尤重也逮神宗始罷諸科併於進士取之迄宋世遵行焉所謂諸科者九經五經開元禮三史三禮三傳學究明經明法也建隆初禮部設

進士及諸科皆秋取解冬集禮部春考試合格及第者列名放榜于尚書省不第者仍俟秋解凡進士試詩賦論各一首策五道帖論語十帖對春秋或禮記墨義十條凡九經帖書一百一十帖對墨義六十條凡五經帖書八十帖對墨義五十條凡三禮對墨義九十條凡三傳一百一十條凡開元禮凡三史各對三百條凡學究毛詩對墨義五十條論語十條爾雅孝經共十條周易尚書各二十五條凡明法對律令四十條兼經並同毛詩之制各間經引試通六爲合格仍抽卷問律本科則否諸州以本判官試進士錄事參軍試諸科見任官應

舉號鑠廳試所屬先以名聞得旨乃解凡就試唯詞賦者許持切韻玉篇挾書及遙口相授者卽遣出凡諸州舉送必先稽版籍察其行爲鄉里所推每十人相保內有缺行連坐不得舉及第者不得呼知舉爲恩門師門及稱門生故事知舉官將赴貢院臺閣近臣得薦所知號公薦乾德初禁之後陶穀子邴擢上第帝曰穀不能訓子安得登第詔食祿之家有登第者奏聞覆試開寶三年詔貢士十五舉嘗終場者禮部以名聞乃下詔貢士司馬浦等一百六人困頓風塵潦倒場屋學固不講業亦難專非有特恩終成遐棄宜各賜本科出身特

奏名恩例自此始五年進士諸科合格者親召對講武殿始放榜尚未及引試也明年翰林學士李昉知貢舉取宋準等旣召對而進士武濟川三傳劉睿材質最闇對問失次黜之濟川昉之鄉人有訴昉徇情者帝籍終場下第姓名得二百六十人皆召見擇其三之二并準以下御殿給紙筆別試詩賦命殿中侍御史李瑩等爲考官增取若干人皆賜及第進士仍以宋準爲首所黜只武濟川餘依元次增者附其末昉等坐責殿試遂爲常制然未有省試殿試之分也八年親試進士王式等帝謂之曰昔者科名多爲勢家所取塞孤寒之路朕親

臨試盡革其弊矣更定王嗣宗第一王式第四自是二
試始分有省元狀元之別云國初天下猶未混一每科
所取進士不過十餘人諸科多不及百人太宗以後所
取漸博乃太平興國二年正月覆試進士得呂蒙正等
一百九人越二日覆試諸科得二百人竝賜及第又閱
貢籍十舉至十五舉諸科一百八十餘人竝賜出身九
經七人不中格帝憐其老賜三傳出身凡五百餘人賜
綠袍鞞笏錫宴開寶寺自爲詩一章賜之三年九月殿
試加論一首自是以三題爲準五年有趙昌國者求應
百篇舉謂一日作詩百篇帝出雜題二十字令各賦五

篇八句日旰僅成數十首率無可觀帝以是科久廢
特賜及第以勸來者八年進士始分三甲錫宴就瓊林
苑上因謂近臣曰朕親選多士殆忘飢渴召見臨問觀
其才技而用之庶使田野無遺逸朝廷多君子爾雍熙
三年廷試始唱名賜第李昉呂蒙正子皆入等上以勢
家不宜與孤寒競進罷之左右言尚有遺才復試得洪
湛等及諸科若干人竝賜及第所得凡五百人帝每親
試閱卷累日方畢其後宰相屢請以春官之職歸有司
如唐故事乃命春官知舉端拱元年禮部放進士榜謗
議蜂起或擊登聞鼓訴求別試帝慮有遺才召下第人

覆試之得馬國祥等及諸科凡七百人以試中為目悉授以官六月復慮有遺才命官重試得合格數百人士上覆試之又拔進士葉齊等及諸科凡百餘人竝賜及第二年有中書吏人及第奪其勅牒詔禁吏人應舉是年蘇易簡知貢舉不敢專其事因請御試上從之自此為定例淳化三年易簡又知舉受詔即赴貢院仍糊名考校遂為例既廷試士為試目所窘相率叩殿檻上請而錢易日未中皆就特黜之所得進士孫何等及諸科共十餘人帝諭之曰爾等守各負志業效官之外更勵精文未無墜前功也詔刻禮記儒行篇賜近臣及京朝官受

任于外者併以賜何等每科進士第一人天子寵之以詩至陳堯叟始易以箴及是併賜焉帝初即位有鮑明遠劉昌言張觀樂史四人以見任官舉進士帝惜科第不之與只遷其官是年滁州軍事推官鮑當等中選始各賜第以後停貢舉者五年真宗咸平元年詔禮部放榜密州發解官坐薦送非人當入金詔特停任三年親試舉人得進士陳堯咨等及諸科共八百餘人又特奏名者九百餘人凡士貢于鄉而屢絀于禮部或廷試所不錄者積前後舉數參其年而差等之遇親策士則別籍其名以奏徑許附試故曰特奏名舊制及第即命以

官上初復廷試賜出身者亦免選於是策名之士尤衆雖藝不及格悉賜同出身又親試河北舉人得進士齊革等十三人諸科三百四十五人賜及第出身命禮部敘爲一舉時帝征契丹駐蹕河北故推恩如此景德四年命有司詳定程式士不還鄉里而竊戶他州以應選者嚴其法省試文理紕繆坐元考官又定親試進士條制凡五等一等二等曰及第三等曰出身四等五等曰同出身大中祥符元年南省下第舉人周叔良等群訟考校不公驗之妄配隸許州三年封泰山四年祀汾陰親試本路服勤詞學經明行脩竝賜第東封路得梁固

等汾陰路得張師德等各三十一人亦推恩也其後置臚錄院又以貢院監門官防緝挾書解衣閱視失取士體亟令止之著令科場官與進士有親嫌皆移試語在張上遜傳仁宗天聖初慮貢士狃於奏名寬恩因循廢學下詔戒勉五年四月賜進士王堯臣以下中庸八年四月賜進士王拱辰以下大學後登第者必賜二書及儒行篇景祐初帝憫孤寒棲遲老而不得進詔令南省就試進士諸科十取其二凡年五十進士五舉諸科六舉嘗經殿試進士三舉諸科五舉及嘗預先朝御試雖試文不合格毋輒黜皆以名聞自此率以爲常諸路見

任官隨侍子弟及五服內親許於本路漕司試解諸路始有別頭試考校則選差本路官彌封謄錄如禮部初貢士踵唐制猶用公卷然多假他人文字或傭人書之賈昌朝言自唐以來禮部采名譽觀素學故預投公卷今有彌封謄錄法則公卷可罷從之寶元中復議試士法知制誥富弼言唐武后殿試之制不足取宜令有司次其高下奏引殿廷唱名賜第遂詔罷殿試議者謂輕上恩墮故事旋復舊范仲淹參知政事意欲復古勸學數言興學校本行實詔近臣議於是宋祁等奏教不本于學校士不察于鄉里則不能覈名實有司束以聲病

學者專於記誦則不足盡人莫若使士皆上著而教之于學校然後州縣察其履行則學者修飭矣乃詔州縣立學士須在學三百日乃聽預秋賦三場先策次論次詩賦通考爲去取而罷帖經墨義仲淹旣去而執政意皆異所更定令悉罷嘉祐二年親試舉人凡與殿試者始免黜落時進士益習爲奇僻鉤章棘句寢失渾厚歐陽脩知貢舉痛裁抑之榜旣出時所推譽皆不在選澆薄者候脩晨朝羣聚詆斥至爲祭文投其家從此文體少變矣王洙侍迺英閣講周禮至三年大比上曰古者選士如此今率四五歲一下詔故士有抑而不得進

者孰若裁其數而屢舉也於是詔間歲貢舉進士諸科悉解舊額之半增設明經出身與進士等而罷說書舉英宗卽位議者以間歲貢士法不便迺詔禮部三歲一貢舉神宗篤意經學深憫貢舉之弊且以西北人材多不在選遂議更法王安石謂古之取士俱本于學請興建學校以復古其明經諸科並廢罷迺詔曰執經藝者專于誦數趨鄉舉者徂于文辭與古所謂三物賓興九年大成亦已蓋矣令兩制以下雜議以聞議者多謂變法便直史館蘇軾曰夫欲興德行在於君人者脩身以格物審好惡以表俗若欲設科立名以取之則是教天

下相率而爲僞也上以孝取人則勇者割股怯者虜其
上以廉取人則弊車羸馬惡衣菲食凡可以中上意者
無所不至自文章言之則策論爲有用詩賦爲無益自
政事言之則詩賦論策均爲無用然自祖宗以來莫之
廢者以爲設法取士不過如此也近世文章華麗無如
楊億使億尚在則忠清鯁亮之士也通經學古無如孫
復石介使復介尚在則迂闊誕謾之士也矧自唐至今
以詩賦爲名臣者不可勝數何負於天下而必欲廢之
帝他日以問安石對曰科法敗壞人才致不如古旣而
中書門下又言今欲追復古制則患於無漸宜先除去

聲病偶對之文使學者得專意經術以俟朝廷興建學
 校然後講求三代所以教育選舉之法行之庶幾可復
 古矣於是改法進士科罷詩賦帖經墨義士各占治易
 詩書周禮禮記一經兼論語孟子謂春秋有三傳難通
 罷之試分四場初大經次兼經大義凡十道後改論語
 孟子義各三道次論一首次策三道禮部試即增一道
 試義者須通經有文采乃為中格不但如明經墨義粗
 解章句而已又立新科明法試律令刑統大義斷按所
 以待諸科之不能業進士者未幾詔進士自第三人以
 下試法或言高科不試則人不以為榮乃詔悉試墨義

三年親試進士始專以策定限千言舊特奏名人試論
 一道至是亦制策焉帝謂執政曰對策亦何足以實盡
 人材然愈於詩賦爾舊取士依注疏帝患諸儒之說不
 能歸一乃八年頒王安石詩書周禮義十學官謂之三
 經新義自明經併進士為一科預選多南人而北人守
 先儒訓詁質厚不能為文辭故預者少哲宗以後立齊
 魯河朔五路之制凡北人皆別考取人始均焉元祐初
 知貢舉蘇軾孔文仲以特奏恩太濫奏曰今特奏者約
 已及四百五十人又許例外遞減一舉則當復增數百
 人此曹垂老無他望布在州縣惟務黷貨以為歸計前

後恩科命官幾千人矣何有一人能自奮厲有聞于時願斷自聖意量取一二十人誠有學問卽許出官其餘皆補文學長史之職詔限攷取數著爲令時議更先朝之政左僕射司馬光曰取士之道當先德行後文學就文學言之經術又當先於詞采神宗專用經義論策取士此乃復先王令典百王不易之法但王安石不當以一家私學令天下學官講解至於律令皆當官所須使爲士者果能知道義自與法律冥合何必置明法一科習爲刻薄非所以長育人材敦厚風俗也四年乃立經義詩賦兩科罷明法科凡習詩賦人兼一經其專經不

習詩賦人增一經以詩禮記周禮左氏春秋爲大經書易公羊穀梁儀禮爲中經每試四場初本經義二道語蓋義各一道次賦及律詩各一首次論一道次子史時務策二道專經者以經義爲主兼詩賦者以詩賦爲主名次高下則於策論參之自復詩賦士多鄉習而專經者十無二三諸路奏以分額各取非均其後遂通定去留經義毋過通額三分之一光又奏乞每歲委升朝文臣各保舉一人應經明行脩科與進士並置程式一如進士惟於登第後推恩優異以勉勵天下示不專取文學之意遂立科凡試進士者及中第唱名日用以升甲

又詔經明行脩科分路別立額六十一人州縣保任上之監司監司考察以聞無其人則否預薦者不試于州郡惟試禮部不中許用特奏名格赴廷試後以為常既而詔須特命舉乃舉毋槩以科場年上其名六年詔復通禮科初開寶中改鄉貢開元禮為通禮熙寧嘗罷至是始復八年中書請御試復用祖宗法試詩賦論策哲宗既親政羣臣多言元祐所更學校科舉制度非是請改之帝念宣仁保祐功不許紹聖初議者益多乃詔進士罷詩賦專習二經廷對仍試策初神宗念字學廢缺詔儒臣探討而王安石乃進其說學者習焉元祐禁

用至是除其禁四年罷春秋科既而復立春秋博士徽宗又罷之崇寧中取士悉由學以升貢凡進士賜第稽元符上書正邪之等而升黜之其元祐學術政事禁不得施用取士專主安石新經字說至政和初稍參用史學未幾以侍御史李彥章言及宰臣何執中議遂禁習詩賦又詔士毋得習史學蓋又陰斥元祐諸臣也宣和三年復詔開封府及諸路並以科舉取士罷州郡學三舍升貢法惟太學仍存三舍以甄序課試遇科舉仍自發解六年禮部試進士萬五千人詔特增百人額正奏名賜第者八百餘人因上書獻頌直令赴試者殆百人

有儲宏等隸大闈梁師成爲使臣或小吏皆賜之第梁師成者於大觀中嘗中甲科自設科以來南宮試者無踰此年之衆然雜流闈宦俱玷選舉非祖宗法也凡士不繇科舉若三舍而賜進士第及出身者其所從得不一凡遺逸文學吏能言事或奏對稱旨或試法而經律入優或材武或童子而皆能文或邊臣之子以功來奏其得之雖有當否猶或可取崇寧大觀之後達官貴胄旣多得賜以上書獻頌而得者又不勝紀矣欽宗卽位復置春秋博士又詔取士用詩賦禁用老莊及王安石字說時士子習王氏之學已久祭酒楊時指以爲邪說

爲御史中丞陳過庭所詆而馮澥崔鷄更相辨論會國事危而貢舉輟矣高宗建炎初武事方殷念士人不能至行在詔諸道類試二年親試賜第如故事其川峽河北京東正奏名不赴者百餘人卽家賜第以龍飛恩也紹興元年歲當明堂復詔諸道類試逮五年始試於南省初場詩賦各一首習經義者本經義三道語孟義各一道次論一道次策三道殿試策如之自紹聖後罷詩賦至是始復九年御史中丞廖剛言國朝三歲一舉每以今年大禮明年科場又明年省殿試今科試明堂俱在嗣歲省司財計難以應辦又初仕待闕率四五年使

進士蔭人同時差注俱不便詔十年諸州依條發解省
殿試展一年後準此十三年國子司業高闕言取士當
先經術請參合三場以本經語孟義各一道爲首詩賦
各一首次之子史論一道時務策一道又次之又春秋
義當於正經出題竝從之十五年依元祐之制分詩賦
經義爲兩科學者競習詞賦經學寢微帝謂侍臣曰不
出數年經學廢矣二十七年詔復行兼經如十三年之
制其後禮部侍郎金安節言熙寧元豐以降經義詩賦
廢興分合隨時更革近合科以來通經者苦賦體雕刻
習賦者病經旨淵微心有弗精知難兼濟請復立兩科

從之先是秦檜趙鼎迭相而程頤王安石之學執論不
一鼎主頤檜主安石及檜專政右正言何若希指請敕
內外師儒黜程頤之學若蓋祖陳公輔疏也檜死高宗
乃詔毋拘程頤王安石一家之說務求至當之論檜子
燔孫塤及姻黨曹冠等皆竊高第及是詔復權要親族
中第覆試法仍奪塤冠等九人出身其有官應試者階
官易左爲右白身者駁放孝宗欲令文士能射御武臣
知詩書命討論殿最之法淳熙二年御試唱第後二日
進士具欄笏入殿起居易戎服各給箭六弓不限斗力
莫不振厲自獻多命中焉天子甚悅五年以待御史謝

廓然言敕有司毋以程頤王安石之說取士未幾祕書
郎趙彥中復上疏謂士之信道自守以六經聖賢爲師
可矣而別爲洛學飾怪驚愚外假誠敬之名內濟虛僞
之實士風日弊人才日偷望明詔執事使明知聖朝好
惡所在以變士風從之時儒生迭興辭章雅正號乾淳
體而孝宗策士多自升黜不盡由有司云光宗初建議
者云省闈試士春令尚淺宜展二月朔殿試則四月初
選日從之寧宗初韓侂胄禁僞學劉德秀何澹胡紘陳
賈沈繼祖張釜輩從而附和之司考校者移檄令自署
非僞學乃許試文稍涉道學者輒黜舊制秋貢春試考

官緦麻以上親若大功以上婚姻之家皆牒送別頭場
惟殿試謂之天子門生雖父兄考校亦不避開禧二年
始詔殿試考校官避親屬理宗朝科目之弊曰傳義曰
換卷曰易號曰卷子出外曰謄錄滅裂寶慶二年詔防
戢焉理宗嘗閱累朝名臣奏議獨善程頤頤兄弟所論
取士之法乃景定五年詔三省參酌於進士舉之外崇
經術考德行立爲一代之典時賈似道當國亦徒爲空
言而已度宗卽位似道復立法凡試士置籍書其鄉貫
姓名年代妻室於科舉條制結勘無碍方許納卷覆試
之日露體索懷挾邊事方殷漫不加意而以科舉累士

人識者嗤之朱熹在孝宗朝嘗議取士之法曰古者大學之教以格物致知爲先而其考校之法又以九年知類通達強立不返爲大成今樂經亡而禮經闕二戴之禮已非正經而又廢其一經之爲教已不能備而治經者類皆舍其所難而就其易僅窺其一而不及其餘若諸子之學同出於聖人諸史則該古今興亡治亂得失之變皆不可闕者而學者一旦豈能盡通若合所當讀之書而分之以年使之各以三年而共通其三四之一諸經試義各二道皆兼大學論語中庸孟子義一道論則分諸子爲四科而分年以附焉諸史分年如經子之

法試策各二道如是則士無不通之經史而皆可用於世矣議雖未上聞而天下誦之按宋世進士得人爲盛而甲科恩數特隆自太祖至仁宗策名前列者或數年至公輔終仁宗朝第一至第三凡三十九人其不至公輔者僅五人而已然皆忠高雅厚爲時名臣其登貴顯非倖致也三名者初授卽爲通判嘉祐四年始著令限資格第一人才得評事簽判以還升通判任滿始除館職王安石爲政又殺其法然公口是得人亦弗逮至徽宗時率以對策阿佞擢高選相羽成風至中興後始變焉凡進士第一人在太祖時楊礪張去華馬適蘇德祥李

景陽劉察李肅劉蒙叟柴成務女德裕張拱賜劉寅安
守亮宋準王嗣宗在太宗時呂豸正胡旦蘇易簡王世
則梁顥程宿陳堯叟孫何在真宗時孫僅孫暨陳堯咨
王曾李迪姚燁梁固張師德徐誦張觀蔡齊王整僅何
弟也堯咨堯叟弟也固顥子也師德去華子也在仁宗
時宋郊王堯臣王拱辰張唐卿呂溱楊宣賈黯馮京鄭
解章衡劉輝王俊民許將在英宗時彭汝礪許安世在
神宗時葉祖洽余中徐鐸時彥黃裳焦蹈在哲宗時李
常寧馬涓畢漸何昌言李金在徽宗時霍端友蔡巖賈
安宅莫儔何臬王昂何渙沈晦在高宗時李易張九成

汪應辰黃公度陳誠之劉章王佐趙逵張孝祥王十朋
梁克家在孝宗時木待問蕭國梁鄭僑黃定詹駉姚穎
黃由衛涇王容在光宗時余復陳亮在寧宗時鄒應龍
曾從龍傅行簡毛自知鄭日誠趙建夫袁甫吳潛劉涓
蔣重珍在理宗時王會龍黃朴徐元杰吳叔告周坦徐
儼夫留夢炎張淵微方逢辰姚勉文天祥周震炎方山
京在度宗時阮登炳陳文龍張鎮孫王龍澤東都進士
既賜第例有期集南渡後置局於貢院特旨賜餐錢賜
第之三日赴馬前三人得自擇同升之彥分職有差朝
謝後拜黃甲設褥於堂上東西相向皆再拜拜已擇榜

宋史新編卷三十四
中年長者一人狀元拜之復擇最少者一人拜狀元所以侈寵靈重年好明少長也數日赴國子監謁謝先聖先師用釋奠禮遂賜聞喜宴侍從已上及知舉官館職皆預焉

制科宋沿前代設之以待才傑之士祕閣試預選然後對制策入等然後加恩賜第蓋賢良茂才之名視進士尤美而恩數視進士尤隆故雖狀元及第猶應制科重可知矣然是科不常置士由是科進者亦甚鮮惟召試館職及後來博學宏詞不親策不賜第多至大用焉太祖建隆三年詔吏部舉書判拔萃科乾德元年覆試拔

舉科田可封宋白譚利用等稱旨賜予有差二年始置賢良方正能直言極諫經學優深可為師法詳閑吏理達於教化凡三科不限前資見任職官黃衣草澤悉許應詔監司守臣解送對策三千言詞理俱優則中選是年賢良方正科惟博州判官顏贄中第帝以應詔者少慮有司舉賢之道未至詔許士人詣闕自薦四年有司舉直言極諫一人堪為師法一人及對策詞理䟽闊不應所問賜酒饌遣之開寶八年詔諸州察民有孝弟力田奇才異行或文器材幹年二十至五十可任使者具送闕下九年諸道應詔凡七百四十人試其業一無可

采而濮州以孝弟薦名者三百七十人召對講武殿率
不如詔猶自陳素習武事復試以騎射輒顛隕失次悉
罷去詔劾本部濫舉之罪咸平四年詔臣僚各舉賢良
方正一人是年策祕書丞查道等七人皆入第四等景
德二年增置博通墳典洞明韜略等科詔中書門下試
察其才將臨軒親策之自是應令寢廣然無有中高等
者言者以爲兩漢舉賢良多因兵荒災變所以詢訪闕
政今國家受瑞登封無闕政也安取此迺罷其科惟戶
部設宏詞拔萃平判等科如舊制仁宗天聖七年詔復
置制舉科乃酌舊制定其名曰賢良方正能直言極諫

博通墳典明於教化科才識兼茂明於體用科詳明
吏理可使從政科識洞韜略運籌帷幄科軍謀宏遠材
任邊寄科凡六以待京朝官之被舉及起應選者又置
書判拔萃科以待選人又置高蹈丘園科沈淪草澤科
茂材異等科以待布衣之被舉者其法先上藝業于有
司有司較之然後試祕閣合格然後天子親策之景祐
初李淑疏言吏部故事選人以格限未至者能試判三
節謂之拔萃此特有司之事耳陛下乃親策之非其稱
矣又所謂茂材異等本求出類之雋而士之不利鄉薦
者始出應焉此二者皆非國家求材之本意也於是罷

宋史新編卷三十四
書判拔萃科諸常鄉舉被黜者毋復應茂材異等科其
幕職州縣官皆得應賢良方正能直言極諫等科後御
史唐詢奏賢良方正六科不用公卿推引往往自舉習
扇澆浮莫甚于此可悉罷之參知政事吳育奏制科不
可罷遂著令制科視進士之期須近臣論薦乃應舉語
在唐詢傳熙寧五年孔文仲對策極論新法王安石惡
而黜之後祕閣試陳彥古不知論目且字不及數亦黜
之呂惠卿黨安石因奏制科止於記誦非義理之學且
進士已試策與制科無異遂詔罷之元祐元年復紹聖
初應制科趙天啓以累上書狂妄黜未幾詔罷是科紹

聖一年詔舉賢良方正能直言極諫科一遵舊制自尚
書兩省諫議大夫以上御史中丞學士待制各舉一人
每人先具所著策論五十篇繳進兩省侍從參考之分
爲三等次優以上召赴祕閣試六論於九經十七史七
書國語荀揚管子文中子內出題除註疏勿用每篇限
五百言學士兩省官考校御史監之四通以上爲合格
仍分五等以試卷繳奏御前折號入四等者天子臨軒
親策限三千言第三等爲上恩數視廷試第一人四等
爲中視廷試第三人皆賜制科出身五等爲下視廷試
第四人賜進士出身不入等者與簿尉差遣其已仕者

與升擢然應詔者殊少乾道初苗昌言奏言祖宗增置制科其立法寬故得士廣請間歲下詔於正文出題不得用僻書註疏追復天聖十科以廣薦揚之路下廷臣雜議皆曰註疏誠可略科目不必廣天下之士屏處山林滯迹遐遠侍從之臣豈能盡知遂如國初之制止令監司守臣解送淳熙四年議者謂制科惟六論一場爲難號曰過閣若罷註疏取四通則其選輕矣乃詔六論增五通爲合格始命官糊名謄錄如故事試院言文卷多懵論目有僅及二通者帝命賜束帛罷歸舉官周必大等皆放罪十一年議者謂賢良之舉本求謹言裨闕

政未聞責以記誦之學帝以爲然乃罷註疏時郡國舉莊冶滕晟試六論皆四通考官顏師魯以平凡罷之大抵制科之選甚難東都自景德後興廢靡常然所得士亦可數富弼王安國以茂材具等王曙吳育孫僅蘇紳夏竦吳奎張方平錢彥遠錢明逸錢藻蘇軾蘇轍以賢良方正范百祿以才識兼茂然入第三等惟吳育蘇軾耳中興百餘年賢良之詔歲下所得僅胡銓與布衣李廬二人其難如此所謂召試館職者宋制館閣不輕畀必試而後授或資格或獻文或薦舉皆得召試於中書學士舍人院或特遣官專試所試詩賦論頌策制誥或

三道或一道中格則授館職景德後惟將命爲知制誥者乃試制誥三道東封及祀汾陰時獻文者多試業得官蓋特恩也治平中英宗謂中書曰水潦爲災言事者云咎在不能進賢何也歐陽脩曰近年進賢路狹往時入館有三路今塞其二矣進士高科一路也大臣薦舉一路也因差遣例除一路也往年進士五人以上皆得試第一人及第不十年有至輔相者今第一人兩任方得試而第二人以下不復試是高科路塞矣往時大臣薦舉即召試今只令上簿候缺人乃試是薦舉路塞矣惟有因差遣例除者半是年勞老病之人此臣所謂薦

舉路狹也帝納之詔宰臣舉館職各五人於是蔡延慶等二十人皆令召試宰臣以人多難之帝曰苟賢豈患多也先召試其半餘須後時神宗試館職罷詩賦更以策論哲宗元祐元年右正言劉安世建言祖宗之待館職也儲之英傑之地以飭其名節觀以古今之書而開益其聰明稍優其廩不責以吏事所以滋長德器養成名卿賢相也近歲其選寢輕或緣世賞或以軍功或酬聚斂之能或徇權貴之薦未嘗較試遂獲貼職多開倖門恐非祖宗德意望明詔執政詳求文學行誼審其果可長育然後召試非試毋得輒命庶名器重而賢能進

三年乃詔大臣奏舉館職並如舊召試除授惟朝廷特除不用此令安世復奏人材高下資歷深淺但奏舉皆可直除名爲更張弊源仍在願倣故事資序及轉運使方可以特命除授庶塞僥倖以重館職之選徽宗時館職皆不試而除紹興元年始復召試凡預召者學士院試時務策一道天子親覽焉所謂博學宏詞者紹聖初罷制科改立此名也時三省言今進士純用經術如詔誥章表箴銘賦頌赦救檄書露布誠諭其文皆朝廷官守日用不可闕且無以兼收文學博異之士遂改置宏詞科歲許進士登第者詣禮部請試如見守官則受代

乃請率以春試上舍生附試不自立院也差官錄引
依進士試章表露布檄書用四六頌箴銘誠序記用古
今體亦不拘四六詔誥赦救不以爲題以四題分二日
試取母過五人三省又覆試之乃分上中二等推恩有
差詞藝超異者恩命臨時取旨大觀四年以格法未詳
改爲詞學兼茂科歲附試于貢士院取母過三人政和
增爲五人不試檄書增制詔中格則授館職宰臣執政
親屬母得試宣和不附試上舍乃隨進士試于禮部紹
興三年復置博學宏詞科制誥詔表露布檄箴銘記贊
頌序於十二題內試其六分爲三場每場古今體各一

試人先投所業三卷朝廷付學士院考其能者隨貢舉
年召試許任子者亦就試所取毋過五人分爲三等恩
數比舊制加優自紹興迄嘉定所得鴻筆麗藻之士共
三十四人祖父子孫相望要途者皆詞科人也理宗嘉
熙三年臣僚以詞科久廢奏言試之太嚴故習之者少
今欲除博學宏詞外更降等立科止試文辭不責記問
命題止分兩場引試須有出身人就禮部投狀獻所業
如試教官例每一歲附銓闈引試惟取合格不必拘額
他時北門西掖南宮舍人之任則擇文墨超卓者用之
其科目則去宏博二字止稱詞學科從之淳祐初罷

定二年復嘉熙之制云

凡童子十五歲以下能通經作詩賦州升諸朝而天子
親試之其命官免舉無常格科或罷或復大觀以前賜
出身者僅數十人孝宗時禮部言本朝童子以文稱者
楊億宋綬晏殊李淑後皆爲賢宰相名侍從今郡國舉
貢問其所能不過記誦宜稍艱其選八年始分爲三等
理宗時罷之詔須卓絕能文者許諸郡薦舉度宗時禮
部侍郎李伯玉言人材貴乎善養不貴速成請罷童子
科息奔競以保幼稚良心詔自咸淳三年爲始罷之
遺逸許公卿薦達蓋慮科目不能盡致天下之才也熙

寧三年諸路搜訪行義爲鄉里推重者凡二十有九人至則館之太學而劉蒙以下二十二人試舍人院賜官有差可謂特盛矣累朝所舉士若咸平之种放嘉祐之邵雍治平之黃君俞熙寧之王安國元豐之程頤元祐之陳師道元符之徐積中興之尹焞王忠民劉勉之胡憲其卓然較著者也

凡學皆隸國子監沿唐制也故國子監有國子生有太學生國子生以京朝七品以上子孫爲之太學生以八品以下子弟若庶人之俊異者爲之仁宗詔諸路州軍監各建學置太學內舍生二百人神宗增定太學外舍

生二千內舍生三百人上舍生百人月一私試歲一公試補內舍生間歲一舍試補上舍生彌封謄錄如貢舉法而上舍試學官不與考校公試外舍生入第一第二等參以所書行藝升上舍上舍試分三等上等取旨授官中等免禮部試以俟殿試下等免解以俟省試學正增爲五人學錄增爲十人學錄參以學生爲之其上舍生積校已優舍試又入優等謂之兩優釋褐中選者卽命以京秩除學官時學制所言國子監以國子名而實未嘗教養國子乃詔許清要官親戚入監爲國子生聽讀額二

百人仍盡以開封府解額歸諸太學其國子生解額以太學分數取之毋過四十人元符二年始令諸州行三舍法考選升補悉如太學州許補上舍一人內舍二人歲貢之其上舍附太學外舍試中補內舍生三試不升舍遣還其州其內舍免試至則補外舍生崇寧元年詔天下州縣竝興學貢士建外學於郊以受之號曰辟雍縣學生選考升州學州學生每三年貢辟雍辟雍專處外舍太學專處上舍內舍既入辟雍試行藝中率然後升太學又增三舍額視舊倍之三年徽宗幸太學官論定之士十六人遂幸辟雍國子司業以下賜賚推恩者

差隨詔取士悉繇學校其州郡發解及試禮部法竝罷自是歲試上舍差知舉如禮部試居首者謂之上舍魁大觀元年又立八行科凡士有八行實狀鄉上之縣縣延入學校實上其名於州第其等孝悌忠和爲上睦婣爲中任恤爲下苟備八行不俟中歲卽奏貢入太學免試補上舍生司成以下審考不誣申省釋褐優命之官八刑則反八行而麗於罪品目旣立有司必求其迹以應令頗失其實而三舍不試而補亦多僥倖是時姦臣主紹述士無敢不誦習王氏學而徽宗惑於老莊列子之說太學辟雍用其書課士學校之教大壞然州郡貢

舉法未久復舊制焉建炎初卽行在置國子監紹興十三年復建太學每科場四取其凡升上舍者皆直赴廷對孝宗以後考校升補之法差異淳熙中兵部尚書王仲行奏言兩優釋褐視狀元制科恩數過之乞先與外任知滁州張商卿亦言中上舍爲學官不數年便可作監司郡守刑政非所素習豈能保其不謬乞先注職官孝宗然之詔與殿試第二人恩例若乃四門學生始於慶曆廣文館生始於元祐皆不久而罷云

內外學官元豐七年始立試法卽舍人院召試大義五道上等爲博士下等爲正錄願授教授者聽時召試六

十人所取僅四人皆名士元祐中中廢胡宗愈言學者初登科途專師席非是詔內外學官經任年三十方得在選又許大臣薦舉經明行脩者爲學官已而論薦益衆乃詔須命舉乃得奏紹聖初詔中外學官非制科進士上舍生入官者並罷三省立格中制科及進士甲第禮部奏名在上三人府監廣文館第一人從太學上舍得第者皆不待試餘召試兩經大義各一道合格則授教官元符詔歲一試增三經紹興五年罷試學官科十六年復試其後試法更革無常云

律學國初置博士掌授法律熙寧六年始卽國子監設

學凡命官舉人皆得自占入學元豐六年用國子司業朱服言命官在學公試律義斷案俱優準吏部試法授官太學生能兼習律學中公試第一比私試第二等建炎三年復明法新科進士預薦者聽試紹興元年復刑法科以曾經試法人為考官五年李洪刑法中第二等命與改秩十五年罷明法科以其額歸進士惟刑法科如舊淳熙七年祕書郎李燾言本朝命學究兼習律令而廢明法科後復明法而以三小經附蓋欲使經生明法法吏通經今宜遵做舊制兼習經義參考優劣從之宗以議臣言罷經義其後罷復不一初紹興末四川類省附試刑法慶元八年罷之

宗學者諸王宮學也其子孫八歲至十四歲皆入學會授環衛官以學藝得召試遷擢者多有之蓋出特恩非有司常試也熙寧始立選舉宗室法凡祖宗袒免親已受命者附鎖廳試袒免外不賜名受官者得試于國子監禮部應進士者試策論應明經者習一大經試大義及策初試中選又覆試之十取其五解額母過五十人廷試亦不與進士同考年及四十累舉不中者推恩錄用徽宗詔禮部試經義律義合格分二等附進士榜授三班奉職文優者奏裁其不能試及試而黜者讀律於

禮部推恩與三班借職大觀四年復詔宗子升上舍者依貢士法俟殿試授官其補入上中等者唱名日取裁後又定上等賜上舍及第中等賜出身授官有差紹興十四年建宗學以百人爲額初行在宗室試國子監者有官鎖應七取其三無官應舉七取其四無官袒免親取應文理通爲合格不限其數而外任主管觀嶽廟試轉運司者取放之額同進士十五年命諸路宗室願赴行在試者依熙寧舊制竝國子監請解不願者依崇寧通用貢舉法孝宗登極優其試格入仕驟踰千人乾道中臣僚上言宗室比年雋異頗多或登詞科或冠多士

與寒士齊驅而入仕寢繁未知裁抑非所以示至公也於是禮部請鎖廳登第者依元資改授餘如舊制按宋初宗室無參選法神宗始選擇差注一二自崇寧以來參選之日在闔選名次之上議者頗陳其害欽宗立臣僚復以爲言始令不注郡守縣令仍與在部人通理名次南渡後復衝改而吏部員多缺少選人當注職官簿尉輒爲宗室所壓云

武舉武選咸平中令兩制館閣詳定未及行天聖八年仁宗親試武舉先閱騎射而後試之慶曆三年詔置武學于武成王廟習兵法議者言古名將如諸葛亮羊祜

杜預等豈專學孫吳尋罷武學其策武舉以策爲去留以弓馬爲高下熙寧五年復建學生員額百人使臣未參班與門蔭草澤人召京官保任人材弓馬應格聽入學習諸家兵法在學三年具考試等第推恩王安石在中書定議祕閣試義策殿前司試武藝及殿試又試策及騎射策武藝俱優爲右班殿直次優爲三班奉職又次借職末等三班差使減磨勘年策入平等而武藝優及次優以下第殺之八年詔武舉與文舉進士同時鎖試於貢院以防進士被黜而改習者遂罷祕閣試又以六帖非全書止以孫吳書爲題元豐元年立大小使臣

試弓馬藝業出官法崇寧間諸州置武學考選升貢悉倣儒學其武藝絕倫文又優特者用文士上舍上等例歲貢釋褐中等仍隸學俟殿試高宗南渡屢親試武舉至紹興十六年始建武學凡初補入學步射弓一石若公私試步射不中卽不許試程文其射格自一石五斗以下至九斗凡五等帝謂輔臣曰國家武選正欲得人今諸將子弟皆恥習弓馬求換文資數年之後將無人習武矣宜勸誘之二十六年帝見武學頽弊恐有遺才詔兵部討論典故參立新制隆興元年侍御史胡沂言唐郭子儀以武舉異等初補右衛長史歷振遠橫塞天

德軍使祖宗時試中武藝人並赴陝西任使又武舉中
選者或除京東捉賊或三路沿邊試其效用或經略司
教押軍隊準備差使今率授以權酷之事是所取非所
用所用非所學也乾道二年中書舍人蔣芾亦以爲言
請以武舉登第者悉處之軍中帝以問洪适适對曰武
舉人以文墨進雜於卒伍非便也帝曰累經任者可以
將佐處之五年廷試始依文科給黃牒榜首賜武舉及
第餘並賜武舉出身淳熙二年詔武科授官做進士甲
科恩例四年以文科狀元代還例除館職亦召武舉榜
首爲閣門舍人七年初立武舉絕倫并從軍法凡前列

願從軍者第一人同正將餘同副將準備將又以七年
爲限欲其諳練可備擢用也宋制武臣試換文資者許
從官三人薦舉紹興令忠武郎以下聽召保官二人以
經義詩賦求試其後太學諸生又不第者多去從武舉
已乃鎖廳應進士第凡以秉義或以忠翊皆換京秩恩
數與第一人比於是林穎秀言武科不得雄健喜功之
士徒啓僥倖名爵之心光宗乃詔罷鎖廳換試寧宗卽
位復其制

筭學崇寧三年始建學生員以二百十人爲額許命官
及庶人爲之其業以九章周髀及假設疑數爲筭問仍

兼海島孫子五曹張丘建夏侯筭法并曆筭二式天文書爲本科本科外人占一小經願占大經者聽公私試三舍法略如太學上舍三等推恩以通仕登仕將仕郎爲次

書學所業篆隸草三體說文字說爾雅博雅方言五書兼通論語孟子義願占大經者聽篆以古文大小二篆爲法隸以二王歐虞顏柳真行爲法草以章草張芝九體爲法其三舍補試升降略同筭學惟推恩降一等

畫學所業曰佛道人物山水鳥獸花竹屋木以說文爾雅方言釋名教授分士流雜流別其齋以居之士流兼

習一大經或一小經雜流則誦小經或讀律三舍試補升降以及推恩略同書學惟雜流授官止自三班借職以下三等

醫學初隸太常寺神宗始置提舉判局及教授學生三百人設三科教之曰方脈科鍼科瘍科方脈以素問難經脈經爲大經以巢氏病源龍樹論千金翼方爲小經鍼瘍科則去脈經增三部鍼灸經崇寧間改隸國子監立三舍倣學制其試中格高等爲尚藥局醫師以下職餘各以等補官爲本學博士正錄及外州醫學教授補道職舊無試元豐三年始差官考試以道德經靈寶

宋史新編卷三十四
度人經南華真經等命題仍試齋醮科儀祝讀政和間
卽州縣學別置齋授道徒蔡攸定選試法其業以黃帝
內經老子道德經爲大經莊子列子爲小經升貢悉如
文士初入官補志士道職賜褐服藝能高出其徒者得
推恩陳州學生慕從道教踰月而道徒換籍殆與儒生
相半有宋瑀者願改道徒內舍獻神霄玉清萬壽宮雅
一篇特換志士俟殿試其誘勸之重如此宣和二年學
罷

宋史新編卷三十四

宋史新編卷三十五

志二十一

明南京戶部主事莆田柯維騏編
選舉下

銓法宋制初襲五代稍損益之淳化以後頗加詳定凡
入仕有貢舉奏廕攝署流外從軍五等其選人注官自
京府留守節度觀察判官下至令錄簿尉凡七等進士
入望州判司次畿縣簿尉九經入緊州望縣五經三禮
通禮三傳三史明法入上州緊縣學究有出身人入中
州上縣太廟齋郎入下州中縣郊社齋郎試銜無出身
人入下州中下縣諸司入流人入下州下縣凡非科第

及特旨者年二十五方注官選人竝須三任六考有奏薦功賞迺得升改其使臣年二十聽差使初任監當次任爲監押巡檢知縣若無功可錄供奉殿直至四十年不遷至道中官缺至千七百人其慎如此文臣少卿監以上中書主之京朝官則審官院主之武臣刺史副率以上內職樞密院主之使臣則三班院主之其後典選之職分爲四文選曰審官東院曰流內銓武選曰審官西院曰三班院元豐更官制應中書樞密除授外悉歸選部舊制堂選屬中書有司卑職屬長吏奏辟神宗以王安石言罷堂選以李士良言罷奏辟竝歸吏銓又舊

兩制不除卿監卽除諫議大夫神宗謂禁近獨超法詔自待制以下竝三年一遷仍轉卿監又舊制選人改官者五日一引對便殿不過二人而待次者率踰二年乃得引神宗詔每甲引四人又舊制銓試用書判或詩賦經律神宗專試斷案律令後增試經義法官同銓曹撰式試分三等上等免選注官優等升資如判超格無出身者賜之出身又舊制選人守選有及三年方遇恩放選至是歲以二月八月試如上法而任子者亦減五年得預試茲二格者蓋以優恩而誘以習律也然冗濫之源實啓於此元祐初文武在銓籍者二萬八千

宋史新編卷三十五
有奇御史上官均司諫蘇軾頗陳其弊終哲宗世改更
不一徽宗定選人七階專用末三階奏補未出官人是
時羣姦竊權壞法其特授特轉者皆無事狀可名直曰
應奉有勞曰獻頌可采曰職事脩舉孟昌齡朱勗父子
童貫梁師成李邦彥等請求皆有定價故不三五年選
人有至正郎或員外帶職小使臣有至正副使或入遙
郡橫行者而蔡京拔用從官不論途轍一言合意即日
持橐又優堂吏至中奉大夫或換防禦觀察使由此任
子益濫政和六年郊恩奏補一千四百六十人選人改
官三百七十人視熙豐不啻倍之臣僚建言欲節其濫

當嚴守磨勘舊法而今之磨勘有局務減考第有州遠
減舉官有用酬賞比類有因大臣特舉有託事到闕不
用滿任有約法違礙許先次而改凡皆棄法用例苟不
裁之將又倍蓰不可計也迺詔惟川廣水土惡地許減
舉餘悉用元豐法既而臣僚又言元豐進納官多所裁
抑應入令錄及因賞得職官止與監當該磨勘者換授
降等使臣仍不免科率法意深矣邇者用兵東南民入
金穀皆得補文武官又優復其戶不受科輸是得數千
緡於一日而失數萬斛於無窮也况大戶得復則下戶
重貧此又弊之大者不聽高宗南渡銓籍散失吏緣爲

奸參選者苦之紹興元年乃定八事以救其弊二年又以呂頤浩言令中書堂除勿侵部注又復文臣銓試以經義詩賦時議斷案律義爲五場願試一場者聽榜首循一資武臣呈試合格者並聽參選三年右僕射朱勝非等上吏部七司敕令格式先是侍御史沈與求言今日矯枉太過賢愚同滯帝曰果有豪傑之士雖自布衣擢爲輔相可也苟未能效其實不若姑守資格迺命吏部注授縣令惟用合格之人然自兵興以來經用不足入貲之恩太廣自承節郎承信郎諸州文學至進義副尉六等後又給通直郎脩武郎秉義郎承直至迪功郎

其注擬資考磨勘改轉蔭補封敘悉依奏補出身法第毋得注令錄及親民官又多故之秋雜流並進曰上書獻策曰勤王曰守禦曰捕盜曰奉使皆閩帥承制除擢有進士徑補京官者有素身冒名卽爲郎大夫者皆一時權宜之制也孝宗詔罷鬻爵又除入粟賑饑者聽補官餘皆停時有議減任子者帝以祖宗法令難於遽改令吏部嚴選試之法自是初官母以恩例免試雖宰執亦不許自陳回授舊制任子降等補文學及恩科人皆免至是悉試凡未經銓中及呈試者勿堂除雖墨敕亦許執奏舊制宗室文資與外官文臣參注窠闕武資則

不得與武臣參注但注添差至是始聽注釐務闕淳熙元年參知政事龔茂良以銓法例寬縱奏言法本無弊例實敗之昔之患在於用例破法今之患在於因例立法法令繁多官曹冗濫蓋繇此也於是重脩舊法焉既而吏部尚書蔡洸以改官奏薦磨勘差注等條法分門編類名吏部條法總類寧宗慶元中重定武臣關升格又定注擬縣令格語在職官志理宗時文臣選人武臣小使臣校尉以下在參注之籍者亦如元祐之數大率三四人共注一闕臣僚患其壅滯請於元展限之上更展半年從之後以御史陳垓言中飭銓法十弊云

遠州銓川峽閩廣其地阻險非中州之人所願乃立八路定差之制許中州及土著在選者隨意就差名曰摺射行之不廢太平興國初詣匭訴寃者流海島自是遠地不敢辭初嶺南闕官往往差攝至雍熙中詔長吏試可者選用之罷秩奏送闕下與出身淳化間又詔嶺南攝官各路惟許選二十員以承乏餘悉罷歸始令嶺南幕職許攜族行受代不得寄留至道初申詔劔南州縣官不得以族行初榮州司理鄭蛟冒禁攜妻之任以平賊功擢推官至是事露上戮蛟而有是詔神宗更制詔川峽福建廣南官罷任迎送勞苦令轉運司立格就注

免赴選後荆湖南亦許就注元祐初或言不均有七弊
乃併八路差歸之銓紹聖復行舊制且許八路人蔭補
出官卽轉運司試中注闕重和間臣僚又言轉運司吏
昧之弊乞立考課法從之建炎初詔福建二廣闕竝歸
吏部惟四川仍舊制初累朝以廣南地遠利入不足以
資上官故使舉人兩與薦選者試刑法於漕司以合格
者注攝兩路謂之待次攝官更兩任無過則錫以真命
至是雖歸之吏部踰年無願就者復歸漕司自神宗朝
宗室不許調川峽官至是宗室多避難入蜀乃聽於四
路注擬紹興八年直學士院勾龍如淵上疏謂行都去

萬里而比歲窳闕歸之朝廷寒遠之士困抑者衆願
參酌前制稍還漕銓之舊立爲定格使與堂除不相侵
紊遂命以小郡知州監以下仍付漕司差注其選人改
官詣司公參理爲到部人稱便焉

補蔭之制凡南郊聖節皆得推恩太祖初定任子之法
臺省六品諸司五品登朝嘗歷兩任然後得請淳化改
元恩文班中書舍人武班大將軍以上竝許蔭補如遇
轉品更蔭一子由是奏薦頗廣至道二年始限翰林學
士兩省五品尚書省四品以上賜一子出身此聖節奏
薦例也先是任子得攝太祝奉禮未幾卽補正員帝謂

膏梁之子不十年坐致閨籍是年悉授同學究出身赴
選集大中祥符二年詔門蔭授京官年二十五以上求
差使者須隸國學一年無過罰方許赴銓試慶曆中以
范仲淹富弼言裁損奏補入仕之路罷聖節奏蔭恩英
宗卽位郡縣致貢奉人悉命以官知諫院司馬光奏言
國家承五代姑息藩鎮之弊因循不革爵祿本待賢才
此等誠爲太濫詔令已行不報慶曆雖罷聖節恩然猶
行之妃主神宗乃併裁抑其任子中選者得隨銓擬注
時試士用法律故入優等往往特旨賜進士出身元祐
初太皇太后諭輔臣裁減恩澤當自上始詔略曰官冗

之患所從來尚矣流弊之極實萃于今苟非裁入流之
數無以清取士之源吾以眇身率先天下忠義之士當
識此誠各忘內顧之心共成節約之制今後每遇合得
親屬恩澤竝四分減一皇太后太妃准此哲宗親政詔
復舊制徽宗時任子者百倍語見前篇崇寧增三舍額
政和著令任子在國學試再入等卽免銓試注官其公
私試嘗居第一得比銓試推恩於是五年間得上等優
恩者二百四十人免試者不與焉臣僚言進士中銓格
者每二百人得優恩不過五七人又或闕上等不取是
蔭補隸學者優於累試得第之人也乃詔在學嘗魁一

試者許如舊恩餘止免銓試高宗中興重定補蔭法建炎元年詔宰執子弟以恩澤任待制以上者並罷紹興七年中書舍人趙思誠疏言祖宗時仕至卿監者皆實以年勞功績得之年必六十身不過得恩澤五六人厥後私謁行橫恩廣有年未三十官至大夫者有一人而任子至十餘者此而不革實蠹政事會思誠去國議遂格帝於后族每加裁抑二十二年詔后族不得任從官孝宗嚴任子選試法語見前篇帝自卽位思革冗官詔百官遇郊權罷奏薦其後屢詔裁減至末年定任子員數宰相十人執政八人侍從六人中散大夫至中大夫

四人帶職朝奉郎至朝議大夫三人通減三分之一於是冗濫漸革寧宗慶元中立補蔭新格自使相以下有差文臣中大夫武臣防禦使以下不許遺表推恩嘉泰初以官冗恩濫凡宗女夫授官者依舊法終身止任一子兩府使相不得以郊恩奏門客著爲令

凡流外補選三省御史臺九寺三監金吾司四方館職掌每歲遣近臣與判銓曹就尚書同試律三道中者補正名理勞考三館祕閣楷書皆本司試書札中書覆試補授百司人歲以二十人爲額毋得僥倖求優試爲職掌者皆限年授外州司戶勒留有至諸衛長史兩省主

事者太祖嘗親閱諸司流外人勒之歸農者四百人闕
寶間詔流外選人經十考入令錄者引對方得注擬驅
使散從官伎術人資考雖多亦不注擬端拱初以河南
府法曹參軍梁正辭楚丘縣主簿喬蔚等五人為將作
監丞充中書堂後官拔選人授京官為堂吏自此始咸
平以前勒留出官及選限皆無定制其隸近司有裁三
二年即堂除外官真宗命翰林承旨宋白與兩制御史
中丞同詳定之所汰冗吏幾二十萬人

保任之制凡改秩遷資必視舉任有無以為應否上自
侍從臺諫館學下暨錢穀兵武之職時亦以薦舉命之

蓋不膠於常法焉凡被舉擢官於誥命署舉主姓名他
日不如舉狀則連坐之太宗時詔內外官所舉不當合
連坐者自首則原之又嘗謂宰臣曰君子小人趣向不
同君子畏慎不欺暗室名節造次靡渝小人雖善談忠
信而履行頗僻在官黷貨罔畏刑罰卿等職在掄材今
令朝臣舉官已足逐末更不擇舉主何由得人也咸平
間祕書丞陳彭年請用唐故事舉官自代每官闕以見
舉多者量而授之於是授官者具表讓一人自代方得
入謝在外者限三月具表附驛以聞遂著為令真宗大
中祥符二年詔募職州縣官初任未閑吏事須三任六

考方得論薦三年定舉官之制自翰林學士以下常參官歲各舉外任京朝官三班使臣幕職州縣官一人著其治行所宜任令閣門御史臺歲終會其數如無舉狀卽具奏致罰出使者亦須舉官後乃入辭諸司使副承制崇班曾任西北邊川廣鈐轄親民者亦倣此制諸路轉運使副提點刑獄官知州通判奏舉部內官屬則不限人數奏報違期則都進奏院以名聞論如不申考帳法三司使副舉在京掌事京朝官使臣凡被舉者中書歲置二籍疏其名銜下列歷任功過舉主姓名及薦舉數一留中書一以五月一日進內明年籍內仍計向來

功過及舉主數使臣卽樞密院置籍大臣出使回須將訪所至及經歷鄰近郡官治迹善惡轉運提刑知州通判赴闕各具前任部內官及鄰近州縣官治迹善惡竝先於閣門投進方得入見朝廷須人才及欲理州縣弊政劇務卽籍內視舉任及課績數多而資歷相當者用之宣敕內盡列舉主姓名凡內外羣臣所舉及三人有成績中書樞密院具奏甄獎如併舉三人俱不集事坐罪仁宗時舉官擢人不常其制天聖後進者頗多始戒近臣非受詔毋輒舉官又定令被薦爲縣令任內復有舉始得遷否則如常選毋輒升補又增設禁限及裁內

外臣僚歲舉數自是舉官之數省矣英宗時判吏部流
內銓蔡抗言被舉者既多則磨勘者愈衆且今天下員
多闕少率三人而待一闕若不稍改除吏愈難臣以爲
可罷知雜御史觀察使以上歲得舉官法從之自是舉
官之數彌省矣故事初入二府舉所知者三人將以觀
大臣之能後來請謁盛行而薦者或不以公神宗卽位
乃罷之熙寧後又損益薦任法舉皆限員而歲又分舉
制益詳矣未幾內外舉官法皆罷令吏部審官院參議
選格惟舉御史法不廢王安石言於帝曰舊法凡執政
所薦卽不得爲御史執政取其平日所畏者薦之則其

人不復得言事矣帝乃令悉除舊法一委中丞舉之趙
抃劉述皆言其不便不聽後官制行兩省官亦得舉之
元祐中嘗命翰林學士中書舍人同舉鄭雍楊畏先後
言近制不便遂寢其命左司諫王巖叟言自罷辟舉用
選格可以見功過而不可以見人材不得已別爲之名
以用其平日之所信故有踏逐申差之目踏逐實薦舉
而不與同罪且選才薦能而謂之踏逐非雅名也况委
人以權而不容舉其所知豈爲通術遂復內外舉官法
及司馬光爲相奏曰人之才或長於此而短於彼雖臯
夔稷契各守一官中人安可求備故孔門以四科論士

漢室以數路得人若指瑕掩善則朝無可用之人苟隨器授任則世無可棄之士莫若使在位達官各舉所知然後克叶至公野無遺賢矣欲乞朝廷設十科舉士一曰行義純固可為師表科有官無官人皆可舉二曰節操方正可備獻納科舉有官人三曰智勇過人可備將帥科舉文武有官人四曰公正聰明可備監司科舉知州以資序五曰經術精通可備講讀科有官無官人皆可舉六曰學問該博可備顧問科同上七曰文章典麗可備著述科同上八曰善聽欲訟盡公得實舉有官人九曰善治財賦公私俱便科舉有官人十曰練習法令能斷請讞科同上應職事官自尚書至給舍諫議寄祿

官自開府儀同三司至太中大夫帶職自觀文殿大學士至待制每歲須於十科內舉三人仍具狀保任中書置籍記之異時有事須材即執政案籍視其所嘗被舉科格隨事試之有勞又著之籍內外官闕取嘗試有效者隨科授職所賜誥命仍備所舉官姓名其人任官無狀坐以繆舉之罪從之紹聖元年章惇用事罷司馬光十科法高宗南渡以中原士大夫隔絕滋久流徙東南者媒寡接疎多致沈滯令侍從搜訪以聞紹興三年復司馬光十科法又用舊制侍從官受命三日舉官一員自代中書門下省籍記每闕官即以舉狀多者進擬內

外武臣舉忠勇智略可自代者一人如文臣法二十九
年聞人滋請凡在官歷任及十考以上無公私罪雖舉
削不及格許降等升改中書舍人洪遵給事中王晞亮
等議曰本朝立薦舉之法必使歷任六考所以遲其歲
月而責其赴功必使之舉官五員所以多其保任而必
其可用今如議臣所請則有力者惟圖見次無材者苟
冀終更出官十餘年可以坐待京秩此不可一也欲減
改官分數以待無舉削者則常被舉之人必有失職淹
滯之歎此不可二也京官易得駟至郎位任子之恩愈
不可減非可以救入流之弊此不可三也祖宗之法非

有大害未易輕議今一旦取二百年成法而易之此不
可四也臣以爲如故便滋議遂寢帝嘗謂輔臣曰朕有
一人材簿臣下有所薦揚退則記其姓名遇有選用搜
而得之無不適當乾道中廷臣言曰今文臣有三人舉
主則爲之循資再任五人則爲之改秩而武臣獨無有
古語曰三辰不軌擢士爲相蠻夷不恭拔卒爲將宜令
都統制視監司者歲舉武臣二人視郡守者歲舉一人
以智勇俱全爲上善撫士卒專有膽勇者次之不拘將
校士卒優以獎擢被舉人有臨戰不用命者與文臣犯
入已贓者同併坐舉主帝可其奏仍著爲法帝以歲舉

京官數濫於是內外薦舉改官員數裁減有差嘉泰一年令內外舉薦並其實跡以聞自是濫舉之弊稍革嘉定十二年命監司守臣舉十科政績所知自代露章列薦並籍記之按宋初內外小職任長吏得自奏辟熙寧罷歸選部然沿邊兵官防河捕盜重課額務場之類尋又立專法聽舉既出常格儉人因之以行其私元祐以來屢行屢止建炎初詔河北招撫河東經制及安撫等使皆得辟置將佐官屬行在五軍并御營司將領亦辟大小使臣諸道郡縣殘破之餘官吏解散諸司誘人填關皆先領職而後奏給付身於是州郡守將皆假軍興

之名換易官屬有罪籍未敘復守選未參部者朝論患之乃令釐正使歸部依格注擬惟陝西五路兩河兩淮京東等路經略安撫司屬官聽舉辟餘路並罷四年初置諸鎮撫使管內州縣官並許辟置紹興二年臣僚又以比年帥守監司辟官攬奪部注又多畀以添差不釐務之闕一郡之中兵官八九員一務之中監當六七員數倍於前日請裁省其闕遂命自今已就辟差理資任者毋得據舊闕以妨下次孝宗乾道末詔監司帥臣非有著令不得創行奏辟所辟毋得攬已差之闕淳熙七年詔未中銓未歷任初改秩人毋得差辟著爲令十一

年詔禁監司郡守辟親戚爲屬吏又選人無考第舉主不及三員及納粟人雖有考第舉主並不聽辟著爲令寶祐中復嚴不應辟之禁受辟者竝鐫秩

考課宋初循舊制文武常參官各以曹務閑劇爲月限考滿卽遷太祖謂非循名責實之道罷歲月敘遷之制置審官院考課中外職事受代京朝官引對磨勘非有勞績不遷秩後定文臣五年武臣七年無贓罪乃遷有犯各加二年其七階選人則考第資歷無過犯或有勞績者遞遷謂之循資蓋周一歲爲一考欠日不得成考三考未替更周一歲書爲第四考太宗詔轉運使察舉

部內官第爲三等歲終以聞而賞罰之先是諸州掾曹縣令簿尉皆吏部南曹給印紙曆子俾長吏書績用愆過秩滿送有司差殿最詔申明其法判南曹董淳言有司批書印曆多闕略令漏書一事殿一選三選降一資自是職事官依州縣給南曹曆子天下知州通判京朝官釐務於外者給以御前印紙令書課績又詔京朝官除兩省御史臺自少卿監以下奉使從政於外受代而歸者令中書舍人郭贇等同考校勞績論量器材以中書所下闕員擬定引對以遣謂之差遣院淳化四年始分置磨勘之司審官院掌京朝官考課院掌幕職州縣

官廢差遣院令審官總之以翰林學士錢若水樞密直學士劉昌言同知審官院考覆功過以定升降又以判流內銓翰林學士蘇易簡知制誥王旦等知考課院重其職也凡流內銓主常調選人考課院主奏舉及歷任有殿最者明年帝親選京朝官三十餘人自書戒諭之言于印紙曰勤政愛民奉法除姦方可書爲勞績又慮其生事謂錢若水曰除姦之要在乎奉法至道初罷考課院併流內銓二年遣使廉察諸道長吏得八人皆降璽書褒諭真宗卽位命審官院考京朝官殿最引對遷秩京朝官引對磨勘自此始帝察羣臣有聞望者得刑

部郎中邊肅等二十四人令閣門再引對並得優升祥符中上玉皇聖號恩詔內外文武官滿三年者許考課於是引對之法廢天禧初又詔凡滿三年非犯入已贓者皆磨勘遷秩於是黜陟之法廢慶曆三年從范仲淹等奏定磨勘保任法自朝官至郎中少卿須清望官五人保任始得遷後言者以爲長奔競罷之八年翰林學士張方平應詔陳時政謂祖宗不立磨勘年歲不爲升遷次序當時人皆自勉非有勞效知不得進祥符之後朝廷益循寬大自監當入知縣知縣入通判通判入知州皆以兩任爲限守官及三年例得磨勘先朝始行未

見其弊及今習以爲常皆謂分所宜得無賢不肖莫知所勸願稍革此制其應磨勘敘遷必有勞績或特救擇官保任如無更增展年嘉祐二年詔文武官舊皆陳乞磨勘有傷廉節自今歲滿令審官三班院舉行之六年詔行守令久任法治平三年考課院言知磁州李田再考在劣等降監淄州鹽酒稅務考劣降等自田始神宗卽位命考課院定縣令考覈條約熙寧五年罷考課院間遣使察訪所至州縣條其吏課知州通判上中書縣令上司農各注籍相參考惟侍從守郡者朝廷察其治焉元豐中詔六察以糾劾多寡爲殿最元祐初以四善

三最定縣令課德義有聞清謹明著公平可稱恪勤懈爲四善獄訟無冤催科不擾爲治事之最農桑墾闢水利興脩爲勸課之最屏除姦盜人獲安處振恤困窮不致流移爲撫養之最通善最分三等五事爲上二爲中餘爲下又增損監司轉運課崇寧間言者乞倣周制歲終省寺監六曹之長各考其屬三年校其勤惰行賞罰紹興二年詔監司守臣舉行考課法五年又下詔戒飭之有請令江淮官久任而課其功過者帝曰朕昔爲元帥時見州縣官一年立威信二年守規矩三年則務收人心爲去計今止以二年爲任雖有葺治之心蓋亦

無暇矣可如所奏二十五年以州縣貪吏爲虐命監司按郡守之縱容臺諫劾監司之失察每歲校所按多寡爲殿最二十七年校書郎陳俊卿援司馬光所論以爲稷契臯夔垂益伯夷各守一官至終身不易使易地而居未必盡其能况其餘乎今監司帥臣東西數易而朝廷百執事亦計日待遷視所居官有如傳舍望令監司帥守有政術優異者或增秩賜金或待終秩而後遷詔三省行隆興四年詔選人任獄祠者並不理爲考乾道二年廷臣請遵故事應監司郡守朝辭日別給御前曆子每考令當職官吏從實批書代還使藉手陛見然後

詔執事精加考覈帝乃命經筵官參照累朝考課法講而行之廣西提刑張維考察部內守令以政平訟理爲臧反之爲否臧之品三否之品二帝下其法諸道禮部郎官胡元質論其法未盡帝問其故元質曰苟無功過可書一切名之以否則何武之平平陽城之下下在今日皆可爲否也八年詔臧否分三等治效顯著爲臧貪刻庸繆爲否無功無過爲平不公者御史臺彈奏光宗初言者謂臧否之法多由請託臧否一定則臧者雖有疵而終不指否者雖有美而終不錄願詔各舉所知而罷其令寧宗以郡國按刺多私遂倣永平舊制於御史

臺別立考課職司一司以舉刺多者為中無所刺舉為下其守令貪墨昏懦致臺諫奏劾者坐監司郡守以容庇之罪度宗更法亦頗酌舊制云

宋史新編卷三十五

宋史新編卷三十六

志二十二

明南京戶部主事莆田柯維騏編

職官一

先王建官之制成周盛矣秦漢以來惟後周參酌周禮及隋文廢罷一切循用近代唐亦因隋無大損益以省臺寺監府衛分庶務以品爵勳階別羣材復有員外之置有檢校試攝判知及諸使之名歷五季不廢也宋太祖懲藩鎮之禍所更張自州縣始其畿內諸司槩襲唐舊顧官無常員亦無專職悉分領中外差遣官惟寄祿而已真宗以來孫何楊億諸人咸請正官名弗果行神

宗諭輔臣倣唐六典酌古今而肇新之乃元豐三年命官詳定於是寄祿以階而百司各還所職不相侵越其後徽宗增文武階高宗釐郎大夫之序實詳且備遂為永制云或問祖宗名實若混而治臻神宗諸君品式若無遺憾而弊滋此曷故哉蓋祖宗之官人也材必慎簡恩無濫授是故事集而費寡民安而國裕治平繫籍三萬員已倍景德時矣胡神宗於恩澤裁損無幾而律令入官之格加優且王安石所增提舉率貪進喜事之人斯曾鞏患國用難給司馬光謂病民之本原者也徽宗放逐正士狎暱佞諛倖竇開而雜流進其甚也刑餘居

師傳黃冠廁朝品欲天下無亂得乎高宗以姦人作相賞罰無章一人任子至十餘者諸將有身兼數鎮者又鬻爵太廣閫帥承制除擢太濫是時土宇僅半東都而官冗過之加以軍旅饑饉如之何不凜凜也因循迄于理度竝姦臣執權蠹深禍促而國不可為矣夫官以輔理而非以養亂也祿以優賢而非以寵姦也考之歷代盛衰興亡如出一軌豈獨宋事可鑒也與哉

三師三公三孤 太師 太傅 太保 少師 少傅

少保 俱正一品 宋承唐制以太師太傅太保為三師太

尉司徒司空為三公未嘗備置第為宰相親王使相加

官其特拜者不預政事皆赴上尚書省除授則自司徒
遷太保有太傅遷太尉檢校官亦如之太尉舊在三師
下由唐至宋太尉加重遂居太傅上宰相至僕射致仕
者以在位久近或已任司空司徒則拜太尉太傅等官
若太師則爲異數趙普開國元勳文彥博累朝耆德方
特拜焉雖太傅王旦司徒呂夷簡各任宰相二十年止
以太尉致仕政和二年詔太師太傅太保依古稱三公
爲真相之任仍考周制立三孤少師少傅少保亦稱三
少爲三次相之任太尉司徒司空竝罷時太師蔡京始
以三公任真相云宣和七年復詔三公不領三省事治

平著令親王不兼三師至徽宗朝皇子有真授者時太
師太傅太保十八人三少不可勝計蔡京與子攸同爲
師保童貫王黼以廝役爲師傅南渡秦檜史浩韓侂胄
史彌遠賈似道俱至太師京檜侂胄似道在姦臣傳
宰相 掌佐天子總百官平庶政事無不統唐六典分
爲三省中書取旨門下覆奏尚書施行然其官稱曰同
中書門下平章事曰同中書門下三品開元中又改政
事堂爲中書門下則三省未嘗不合一也宋承唐制以
同平章事爲宰相無常員有二人則分日知印押班以
丞郎已上至三師爲之首相或加尚書左僕射門下侍

郎次相或加尚書右僕射中書侍郎資淺者曰同中書門下平章事又承唐制以昭文館大學士兼修國史集賢殿大學士宰相以次領其一如范質王溥魏仁浦是也三人罷趙普獨相初領集賢續遷修史久之方遷昭文迄于王旦或三相或二相或獨相皆領其一繼後首相領昭文館監修國史次相領集賢遂爲例元豐五年更中書門下平章事之名於三省置侍中中書令尚書令俱以官高不除而以尚書令之貳左右僕射爲宰相左僕射兼門下侍郎以行侍中之職右僕射兼中書侍郎以行中書令之職中書門下自是分矣是時蔡確爲

右相欲奪左相王珪權故主此議以倣唐制於是右相奏事取旨首相不與聞而駁奏往復事多稽滯元祐初司馬光請令三省合班奏事分省治事紹聖不復更革蓋章惇爲門下恐權之去已耳議者謂三省合班進呈不應自駁已行之命是省審之職可廢也政和二年改侍中爲左輔中書令爲右弼改左右僕射爲太宰少宰仍兼兩省侍郎靖康中復改太宰少宰爲左右僕射建炎三年以呂頤浩言合三省爲一左右僕射竝加同中書門下平章事乾道八年詔左右僕射依漢制改爲左右丞相仍省侍中中書令尚書令員以左右丞相充詳

定敕令所言舊左右僕射非三省長官故爲從一品今左右丞相充三省長官卽合爲正一品從之丞相官以太中大夫以上充初仁宗時邊事遽以宰相兼樞密使後兵興皆然南渡置御營使提舉修政局制國用使都督諸路軍馬皆以宰相兼執政同兼造罷

平章軍國重事 元祐中置文彥博以太師落致仕呂公著守司空相繼爲之序宰臣上所以處老臣碩德特命以寵之也故或稱平章軍國重事或稱同平章軍國事五日或兩日一朝非朝日不至都堂徽宗以後姦臣擅權往往亦有是命如蔡京王黼以太師總三省事三

日一朝開禧初韓侂胄拜平章討論典禮乃以平章事爲名蓋省重字則所預者廣去同字則所任者專邊事起乃命一日一朝省印亦歸其第宰相不復知印其後賈似道尊寵彌隆位皆在丞相上

使相 凡親王樞密使留守節度使京尹兼侍中中書令同平章事者皆稱使相不預政事不書敕惟宣敕除授者敕尾存其銜乾德二年三相范質等並罷趙普拜相李崇矩拜樞密無署敕者太祖以問竇儀陶穀穀謂尚書乃南省六曹之長可署儀謂皇弟開封尹同平章事卽宰相之任可署遂從儀議太祖太宗時宰相罷爲

使相只趙普一人真宗時寇準王欽若二人乾興後難
遽數也元豐改使相爲開府儀同三司凡使相奉祠者
則曰充宮觀使不曰提舉史浩以使相提舉誤也

參知政事

正二品

掌副宰相毗大政參庶務乾德二年

置以樞密直學士兼居正兵部侍郎呂餘慶並本官參
知政事時已相趙普欲置副難其名稱問翰林學士陶
穀曰下宰相一等有何官對曰唐有參知機務參知政
事故以命之仍令不押班不知印不升政事堂未欲與
普齊也開寶六年始詔居正餘慶於都堂與宰相同議
政事至道元年詔宰相與參政輪班知印同升政事堂

押敕齊銜行則竝馬自寇準始舊額不過二員至道
增四員非常制也元豐新官制廢參知政事置門下中
書二侍郎尚書左右丞代其任建炎省左右丞復以門
下中書侍郎爲參知政事遂爲定制故事丞相闕則參
知政事輪日當筆謁告則否淳熙中虛相位者三年皆
參知政事龔茂良行相事云

門下省

受天下之成事審命令駁正違失受發通進

奏狀進請寶印凡中書省畫黃錄黃樞密院錄白畫旨
則留爲底及尚書省六部所上無法式事皆奏覆審駁
給事中讀侍郎省侍中審進入而頒降之設官凡十有

一侍中侍郎左散騎常侍各一人給事中四人左諫議大夫起居郎左司諫左正言各一人元豐八年以門下外省為後省宋初循舊制以中書門下平章事為宰相之職復用兩制一人判門下省事官制行始釐正焉

侍中 掌佐天子議大政審中外出納之事自建隆至熙寧真拜侍中纔五人雖有用他官兼領而實不任其事中興後省侍中不置詳見宰相篇

侍郎 掌貳侍中之職與知樞密院同知樞密院中書侍郎尚書左右丞為執政官沿革見參知政事篇

左散騎常侍 正三品 左諫議大夫 從四品 左司諫 正七品

左正言 從七品 同掌規諫諷諭凡朝政闕失百官非

其人百司事違失皆得諫正謂之諫院左屬門下右屬中書皆附兩省班籍通謂之兩省官左右司諫乃左右補闕之任左右正言乃左右拾遺之任太宗始改焉須別降敕許赴諫院供職者方為諫官他官領者謂之知諫院諫官領他職者則不預諫諍真宗始詔不兼職官制行專任言責國初以來諫官只六員左右散騎常侍始終未嘗除人御史大夫亦然或謂兩官臺諫之長非宰執所利故無有啓之者淳熙末用林栗言置左右補闕拾遺專任諫正不任糾劾之事光宗立竝改他官拾

遺補闕自此廢於是近臣少進言者

給事中

正四品

分治六房掌讀中外出納及判後省事

若政令失當除授非其人則論奏駁正凡章奏日錄月以進考其稽違而糾治之太宗末年停罷以封駁司付銀臺司官制行給事中始正其職而封駁司歸門下後又著令給事中許書畫黃不書草紹聖四年葉祖洽言兩省置給舍使之互察今中書舍人兼權封駁則給事中之職廢詔特旨書讀不迴避餘互書判元符三年翰林學士曾肇言門下之職所以駁正中書違失近日給事封駁中書錄黃乃令舍人書讀行下墮壞官制有損

浴體建炎間用舊制置門下後省以給事中爲長官合

三省爲一紹興以後常除二人

起居郎

從六品

掌記天子言動御殿則侍立行幸則從

大朝會則與起居舍人對立於殿下螭首之側謂之左

右史凡朝廷事皆書以授著作官國朝舊置起居院命

三館校理以上修起居注熙寧四年詔諫官兼修注者

因後殿侍立許奏事元豐二年兼修注王存乞復起居

郎舍人之職未果行故事左右史雖日侍立而欲奏事

必稟中書俟旨存因對及之八月迺詔雖不兼諫職許

直前奏事蓋存發之也官制行改修注爲郎舍人六年

詔左右史分記言動元祐元年仍詔不分

符寶郎從七品掌外廷符寶之事置二人靖康罷

通進司銀臺司 隸給事中掌受天下章奏及閣門百

司奏牘表疏以進御頒布知司官二人兩制以上充

進奏院 隸給事中掌受詔敕及百司符牒頒之

登聞檢院 登聞鼓院 檢院隸諫議大夫鼓院隸司

諫正言掌受文武官及士民章奏表疏先經鼓院進狀

或為所抑則詣檢院並置局于闕門之前舊制稱判元

豐新制凡稱判者悉除去而二院猶未改政和六年詔改

為監檢鼓糧料審計官告進奏號六院中興後其職

並並以邑令有政績者為之例為察官之選

中書省 掌進擬庶務宣奉命令行臺諫章疏凡內外

官除授皆掌之命令之體有七曰冊書立后妃封皇太

子親王大長公主拜三公三師三省長官則用之曰制

書處分軍國大事頒赦宥德音命尚書左右僕射開府

儀同三司節度使則用之曰誥命文武官遷改封贈則

用之曰詔書賜待制大卿監中大夫觀察使以上則用

之曰敕書賜少卿監中散大夫防禦使以下則用之曰

御札布告登封郊廟及大號令則用之曰敕榜賜酺及

戒勵百官曉諭軍民則用之中書省承制畫旨以授門

下省令宣之侍郎奉之舍人行之留其所得旨為底大事奏稟得旨者為畫黃小事擬進得旨者為錄黃凡事干因革損益而非法式所裁者論定而上之諸司傳宣特旨承報審覆然後行下設官凡十有一令侍郎右散騎常侍各一人舍人四人右諫議大夫起居舍人右司諫右正言各一人元豐八年以中書外省為後省

令 掌佐天子議大政授所行命令而宣之國朝未嘗真拜淳化三年升在三師上他官兼領者不預政事然止曹佺一人餘皆贈官中興後省中書令不置詳見宰

相籍

侍郎 掌貳令之職參議大政沿革見參知政事籍

右散騎常侍 正三品 右諫議大夫 從四品 右司諫 正四品

右正言 從七品 職掌與門下省同

舍人 正四品 掌行命令為制詞分治六房隨房當制事

有失當及除授非其人則論奏封還詞頭國初為所遷

官實不任職復置知制誥及直舍人院與學士對掌內

外制學士內制舍人外制謂之兩制富弼為知制誥封

還劉從愿妻封遂國夫人詞頭宋舍人繳還詞頭自弼

始官制行遂以實正名判後省之事中興後他官攝者

稱權舍人資淺者為直舍人院

起居舍人

從六品

掌同起居郎侍立修注官他官領者

謂之同修起居注官制行以郎舍人為職任淳熙後兩

史或闕而用資淺者為權侍立修注官

檢正諸房公事

正六品

掌糾正省務五房各一人熙寧

三年置以京朝官充若選人即為習學公事官制行以

其職歸左右司初設品秩尚卑及政和更制品秩乃崇

權任甚重中興後置中書門下檢正諸房公事二員序

位在左右司上迄不能廢

尚書省

掌施行制命凡天下之務六曹所不能與奪

者總決之應取裁者隨所隸送中書省樞密院事有成

法則六曹準式具鈔令僕射丞檢察簽書送門下省

聞審察吏部注擬文武官及封爵承襲賜勳定賞之事

朝廷有疑事則集百官議其可否凡更改申明敕令格

式一司條法則議定以奏覆太常考功諡議亦如之季

終具賞罰勸懲事付進奏院頒行于天下設官凡九尚

書令左右僕射左右丞左右司郎中員外郎各一人政

和二年詔尚書內省分六司以掌外省六曹所上事

令掌佐天子議大政奉所出命令而行之自建隆以

來不除惟親王元佐元儼以使相兼領不預政事政和

二年詔尚書令太宗皇帝曾任今宰相之官已多不須

置然是時說者謂唐太宗曾為尚書令故郭子儀不敢拜熙陵未嘗任此蓋時相蔡京不學之過宣和復置令亦虛設中興後竝省不置詳見宰相篇

左僕射 右僕射 掌貳令之職與三省長官皆為宰相之任沿革見宰相篇

左丞 右丞 掌貳僕射之職沿革見參知政事篇

左司郎中 右司郎中 俱正六品 左司員外郎 右司員

外郎 俱從六品 掌分治省事而舉正六曹文書之稽緩違

失者號都司亦號左右曹中興以都司提領權皆務都

茶場孝宗復添置右司郎官二員其後左藏封樁庫亦

都司提領竝不係戶部經費

提舉修敕令 熙寧編修三司令式命王安石提舉是

後皆以宰執兼詳定官以待從兼刪定官無常員大觀

三年詔六曹刪定官併入詳定一司敕令所為一局紹

興中罷乾道中復置以參知政事同提舉淳熙末林栗

請廢敕令局紹熙復置慶元置提舉同提舉如故事仍

以編修敕令所為名 刪定官正八品

制置三司條例司 掌經畫邦計議變舊法以通天下

之利熙寧二年置以知樞密院陳升之參知政事王安

石為之蘇轍程顥等皆為屬官後判大名府韓琦言大

臣所領條例司止是定奪之所今不關中書徑自行下
則是中書之外又有一中書也乃罷歸中書

三司會計司 熙寧七年置於中書以宰相韓絳提舉
先是絳言總天下財賦而無考較盈虛之法章惇亦以
爲言乃置是司既而事多濡滯絳坐罷局尋廢

編脩條例司 熙寧初置八年罷

經撫房 專治邊事宣和四年王黼主伐燕之議置于

三省不復關樞密院六年罷

提舉講議司 崇寧元年詔如熙寧條例司故事都省

置講議司以宰臣蔡京提舉侍從爲詳定官卿監爲參

詳官又置檢討官宣和六年又於尚書省置講議司命

太師致仕蔡京兼領聽就私第裁處仍免簽書

儀禮局 大觀元年詔置於尚書省以執政兼領詳議

官二員以兩制充政和三年五禮儀注成罷局

禮制局 討論古今宮室車服器用冠昏喪祭沿革制

度政和二年置於編類御筆所有詳議司詳議官宣和

二年詔與大晟府製造所協聲律官竝罷

樞密院 掌軍國機務兵防邊備戎馬之政令出納密

命以佐邦治凡侍衛諸班直內外禁兵招募閱試遷補

屯戍賞罰之事皆掌之與中書對持文武二柄號爲二

府每朝奏事與中書先後上殿官制行隨事分隸六曹
專以本兵爲職而國信民兵牧馬總領仍舊隸焉仁宗
時二邊用兵知制誥富弼建言邊事係國安危不當專
委樞密乃詔中書同議諫官張方平亦言中書宜知兵
事乃以宰相呂夷簡章得象竝兼樞密使邊事定罷兼
使熙寧初滕甫言趙明與西人戰中書賞功而密院降
約束郭逵修堡樞密院方詰之而中書下褒詔願大臣
凡戰守除帥議同而後下神宗善之元豐改官制議者
欲廢密院歸兵部帝曰祖宗不以兵柄歸有司故特命
官統之互相維制胡可廢也元祐四年梁燾劉安世言

朝華五代之弊文武之柄未嘗專付一人乞依故

命大臣兼領紹興七年以宰相張浚兼樞密使其後兵
興則兼兵罷則否開禧以宰相兼使爲未制

樞密使

從一品

知樞密院事

同知樞密院事

俱正二品

樞密副使

簽書樞密院事

從二品

同簽書樞密院事

使及知院佐天子執兵柄而同知副使爲之貳漢乾

祐中除樞密使始降麻如將相之制宋因之國初有使

則置副有知院則置同知院資淺則用樞密直學士簽

書院事其同簽書院事自治平郭逵始有使副仍置知

院自熙寧陳升之始元豐改官制置知院同知二人罷

使副簽書正員元祐初復置簽書仍以樞密直學士充同簽書中興復置樞密使及副使然副使自岳飛後無有除者開禧以後樞密使與知院同知副使亦或並除其簽書同簽書並帶端明殿學士恩數特依執政或以武臣爲之亦異典也

都承旨

從五品

副都承旨

正六品

掌承宣旨命通領院

務若便殿侍兵閱試禁衛兵校則隨事敷奏承所得旨以授有司蕃國入見亦如之熙寧五年以同修起居注曾孝寬兼都承旨參用儒臣自孝寬始元豐四年客省使張誠一爲都承旨復用武臣自誠一始元祐初復用

文臣其後以待制充崇寧以後專用武臣紹興詔依舊制乾道初再用武臣自張說始淳熙九年復用士人自蕭燧始副都承旨文武通除

檢詳諸房文字

從六品

熙寧四年置無定員以館職編

修經武要略官王存等四人充元豐罷政和更制權任與中書檢正同中興後序位在左右司下迄不能廢

計議官

正八品

建炎四年罷御營司併歸樞密院爲機

速房所屬置幹辦官四員詔並改爲計議官紹興罷

編修官

正八品

隨事置無定員以本院官兼者不入

熙寧之制以館職充紹興置二員

監三省樞密院門 舊以小使臣及內侍官充嘉定中
詔以曾經作縣通判資序人充小使臣省罷內侍官以
三省樞密院門機察官繫銜

主管三省樞密院架閣文字 嘉定八年置一員以選
人京朝官通差

三省樞密院激賞庫 三省樞密院激賞酒庫 監官
各二人二庫並因紹興用兵勅以備邊監官初用武臣

嘉泰末易以選人

宣徽院 南院使 北院使 掌總領內諸司及三班
內侍之籍郊祀朝會宴饗供帳之儀應內外應奉采

其各物南院資望比北院頗優然皆通掌止用南院
印宣徽位尊事簡常以檢校為使或領節度及兩使留
後闕則副樞一人兼領二使亦有兼領副樞簽樞者而
勳舊大臣罷政者往往領焉故事與參政樞副以先後
入敘位熙寧四年詔位參政樞副下著為令官制行罷
宣徽院以職事分隸省寺而使號猶存元祐復置如舊
制紹聖罷南渡後不復置

三司使 副使 判官 鹽鐵使 度支使 戶部使

三部副使 三部判官 三司之職國初沿五代之

制置使以總國計應四方貢賦之入朝廷不預一歸三

司通管鹽鐵度支戶部三部號曰計省位亞執政目為計相其恩數廩祿與參樞同鹽鐵掌天下山澤之貨關市河渠軍器之事以資邦國之用度支掌天下財賦之數每歲均其有無制其出入以計邦國之用戶部掌天下戶口賦稅之籍權酒工作衣儲之事以供邦國之用太平興國八年分置三使淳化四年復置使一人總領三部又分天下為十道置使二員分掌曰左計曰右計又置總計使五年罷復置三部使咸平六年又罷三部使復置三司一員三部勾院判官各一人又有都磨勘司都主轄支收司拘收司都理欠司都憑由司開折司

發放司勾鑿司催驅司受事司皆屬三司判司官各一人並以朝官充或兼判沿革見陳恕傳又有衙司管轄官二人勾當公事官二人三司使例以兩省五品以上及知制誥雜學士學士充亦有輔臣罷政出外召還充使者副使以員外郎以上歷三路轉運使及六路發運使充判官以朝官以上歷諸路轉運使提點刑獄充三部副使各一人三部判官各三人充職略同又有推勘公事一人勾當諸司馬步軍糧料院官各一人勾當馬步軍專勾司官一人亦屬三司或用朝官或用三班或兼判熙寧中以免役農田水利新法歸司農以胄案歸

軍器監修造歸將作監推勘公事歸大理寺帳司理欠
司歸比部衙司歸都官坑冶歸虞部元豐官制行罷三
司竝歸戶部

翰林學士院 翰林學士承旨 翰林學士俱正三品 知

制誥 直學士院 翰林權直 學士院權直 掌制

誥赦敕國書及宮禁所用文詞乘輿行幸則侍從備顧

問有獻納則請對仍不隔班凡命為學士遣使就第宣

詔召入院上日敕設會從官侑以樂蘇易簡為承旨太

宗飛白書玉堂之署賜之元豐中命學士佩魚見執政

議事則繫鞵徽宗御書院額曰摘文堂蓋寵異之也蘇

易簡賈黃中嘗以學士管勾差遣院官制行專典內制

故必帶知制誥非學士又次不可得凡他官入院未除

學士謂之直院權者謂之權直淳熙中議者謂翰林供

奉非專掌制誥之地乃改為學士院權直後復稱翰林

權直然亦互除不廢權正或至三人

翰林侍讀 侍講正七品 掌經筵講讀備顧問擇侍從

有學術者為之真宗始置侍講學士侍讀學士臺諫例

不兼經筵仁宗以御史中丞賈昌朝長於講說故特召

之又舊制經筵賜坐而就案立講自仁宗始熙寧初王

安石欲復坐講龔鼎臣蘇頌劉攽等不可且疏朝廷班

制以待講居侍讀下元豐新官制廢學士而侍讀侍講
但爲兼官必侍從以上乃得之秩卑資淺者爲說書元
祐間范祖禹司馬康竝以著作佐郎兼侍講蓋殊命也
時程頤爲說書請復坐講不報自賈昌朝後臺丞多兼
講讀諫長無有兼者紹興中秦檜用其黨方俟嵩以中
丞兼羅汝楸以諫議大夫兼遂爲例凡經筵歲以仲春
至端午仲秋至長至講讀官輪直或便殿或邇英閣或
延英閣或集賢閣或間日或每日無常制寧宗卽位增
置講讀官詔晚講官坐講尋罷

崇政殿說書

從七品

景祐元年置以賈昌朝趙希言王

宗道楊安國爲之日輪二人祗候其職卽侍講侍讀也
時侍講學士孫奭年耆乞外因薦昌朝等故有是命慶
曆二年以趙師民預講官復爲崇政殿說書蓋資淺則
爲說書不兼侍講也元祐中程頤司馬康以布衣爲說
書崇寧中除說書二人皆以隱逸起蔡卞呂瓘仍遂其
性詔以仕服隨班朝謁入侍渡江後尹焞以祕書兼王
十朋范成大以郎官兼皆殊命秦檜弟梓兼說書子熈
繼兼侍讀每除言路必預經筵檜死始罷慶元後臺丞
諫長暨副端正言司諫以上無不預經筵兼說書者

觀文殿大學士

從二品

學士

正三品

國初置文明殿學

史記新編卷三十六
士慶曆中宋庠言文明之稱同真宗謚號乃詔改爲紫宸殿學士以參知政事丁度爲之時學士多以殿名爲官稱遂稱曰丁紫宸御史何郟以爲有嫌乃改延恩殿爲觀文殿置觀文殿學士仍以度爲之然觀文乃隋煬帝殿名也皇祐初特置觀文殿大學士班在學士之上六尚書之前以寵待舊相自賈昌朝始熙寧中韓絳得罪罷以明堂恩授觀文殿學士宰相不爲大學士自韓絳始中興後非宰相而除者自秦熈始學士例非任執政弗除其後王韶王陶爲之蓋異恩云

資政殿大學士

學士

俱正三品

王欽若罷參政真宗特

資政殿學士以寵之班亞翰林學士未幾以爲大學士班文明殿學士之下翰林學士承旨之上自是二十年始除三人皆宰相非宰相而除者自宋庠始慶曆元年定置大學士二員學士三員元豐中韓維陳薦以東宮舊臣亦特授焉紹興中秦檜子熈自翰林學士承旨爲資政弟梓以端明卒湖州進大資致仕恩數並同參政是後從臣自端明視政府而序進者遂爲常矣

端明殿學士

正三品

唐明宗置端明殿學士以翰林學

士馮道趙鳳充班翰林學士上仁宗明道初改承明殿爲端明殿置學士以翰林侍讀學士宋綬充班翰林學

士下訖元豐多以待學士久次者以執政爲之自王安
禮始以前執政爲之自曾孝寬始政和四年改端明殿
爲延康殿又改樞密直學士爲述古殿直學士五年又
置宣和殿學士中興後端明樞密俱復舊樞密直學士正三品
總閣學士正三品直學士從三品待制從四品直閣正七品
宋庶官之外別加職名所以厲行義文學之士高
以備顧問其次與論議典校讎得之爲榮元豐中修三
省寺監之制其職竝罷滿歲補外然後加恩兼職直龍
圖閣省郎寺監長貳補外或領監司帥臣則除之待制
直學士給諫以上補外則除之係一時恩旨非有必得

之理元祐二年詔復增館職及職事官竝許帶職尚書
二年加直學士中丞侍郎給舍諫議通及一年加待制
紹聖三年詔職事官罷帶職非職事官仍舊中興後學
士率以授中司列曹尚書翰林學士之補外者權尚書
給諫侍郎則帶直學士待制其直閣做元豐之制監司
帥臣兼之自龍圖閣以下各隨高下而等差焉

龍圖閣學士 直學士 待制 直閣 大中祥符三
年置學士班在樞密直學士上景德四年置直學士班
在樞密直學士下景德元年置待制四年詔班在知制
誥下直閣語見前後篇閣建自大中祥符以奉太宗御

製及屬籍世譜圖書符瑞之物

天章閣學士 直學士 待制 直閣 天聖八年置

待制慶曆七年置學士直學士並班在龍圖閣下學士

罕以命人迄仁宗世纔王贄一人秦堪自顯謨閣進直

天章以稱呼非便辭詔改龍圖自是天章不為帶職若

天章閣侍講則景祐四年置政和置直閣閣建自天禧

以奉真宗御製中興後龍圖所藏圖籍屬籍及符瑞之

物獨藏于天章閣祖宗御容潛邸旌節亦安奉焉

寶文閣學士 直學士 待制 直閣 舊名壽昌閣

慶曆改寶文治平四年神宗卽位置學士等職以呂公

著學士以邵必為直學士恩數視龍圖政和置直閣

初厚陵以藏仁宗御製及神宗以厚陵御書附焉

顯謨閣學士 直學士 待制 直閣 從七品 下並同 建中

靖國元年置學士等職崇寧元年詔如三閣故事序位

在寶文閣之下政和置直閣閣建自元符以奉神宗御

集崇寧元年圖畫熙寧元豐功臣

徽猷閣學士 直學士 待制 直閣 大觀二年建

閣以藏哲宗御集置學士等職政和置直閣

敷文閣學士 直學士 待制 直閣 紹興十年置

時建閣以藏徽宗御製

煥章閣學士 直學士 待制 直閣 淳熙十五年

置時建閣以藏高宗御製

華文閣學士 直學士 待制 直閣 慶元二年置

時建閣以藏孝宗御製

寶謨閣學士 直學士 待制 直閣 嘉泰二年置

時建閣以藏光宗御製

寶章閣學士 直學士 待制 直閣 寶慶二年置

時建閣以藏寧宗御製

顯文閣學士 直學士 待制 直閣 咸淳元年置

時建閣以藏理宗御製

集英殿修撰正六品

舊貼職有集賢殿脩撰直龍圖閣

直祕閣三等政和六年增置集英殿修撰右文殿修撰

祕閣修撰與舊為三等又龍圖天章寶文顯謨徽猷祕

閣竝增置直閣與舊為六等舊貼職無雜壓至是定為

雜壓中興後集英修撰以寵六曹權侍郎之補外者下

待制一等所增敷文等直閣貼職語見總閣篇

右文殿修撰從六品

紹聖二年易集賢院學士為修撰

政和六年詔集賢殿舊無此名祕書省殿名右文其改

為右文殿修撰次於集英為貼職高等

祕閣修撰從六品

政和六年置以待館閣資深者多自

直龍圖閣遷焉紹熙中陳傅良請以右文祕閣修撰并舊館閣校勘三等爲史官自校勘遞遷右文俟數年有勞績遷次對庶有專官之効無冷局之嫌不果行

直龍圖閣 祥符九年以馮元爲太子中允直龍圖閣直閣之名始此凡館閣又次者必遷直龍圖閣皆爲擢待制之基也元豐後遂爲補外者貼職語見前篇

直祕閣 宋初國史有三館曰昭文館曰史館曰集賢院皆仍前代之制太宗新建三館賜名崇文院及端拱初就崇文院中堂建祕閣擇三館真本書籍萬卷及內出古畫墨跡藏其中置直閣校理真宗置檢討校勘等

員凡直昭文館直史館直集賢院直祕閣與集賢殿撰史館修撰直龍圖閣皆爲館職高等其次曰集賢校理曰祕閣校理官卑者曰館閣校勘曰史館檢討均謂之館職記注官闕必於此取之非經修注未有除知制誥者元豐以前館職非名流不可得凡狀元制科一任還及大臣論薦者乃得召試入格乃授謂之入館時人語曰寧登瀛不爲卿寧抱槩不爲監其貴如此官制行去館職以崇文院爲祕書省罷直館直院之名獨以直祕閣爲貼職皆不試而除蓋特以爲恩數而已元祐雖復館職而貼職猶繁政和以來監司郡守多緣應奉遷

增貼職爲九等濫及庸瑣其名益輕紹興五年定館職
額十八員乾道元年詔館職更迭補外然試法竟不能
復蓋授非其人人亦弗之重也詳見祕書監篇

宋史新編卷三十六

